

ADMINISTRACIÓN LOCAL

MUNICIPAL

MANCOMUNIDADE DE CONCELLOS DO MORRAZO

Ordenanzas e Regulamentos

APROBACIÓN DEFINITIVA DA ENTRADA EN VIGOR DA ORDENANZA REGULADORA DO PRÉSTAMO DE BIOTRITURADORAS A PARTICULARES PARA A XESTIÓN DA BIOMASA DOMICILIARIA

ANUNCIO DE APROBACIÓN DEFINITIVA

Ao non presentarse reclamacións durante o prazo de exposición ao público (BOPPO núm. 183 de 22 de setembro de 2021), queda automaticamente elevado a definitivo o Acordo de aprobación inicial da Ordenanza reguladora do préstamo de biotrituradoras a particulares para a xestión da biomasa domiciliaria, cuxo texto íntegro se fai público, para o seu xeral coñecemento e en cumprimento do previsto no artigo 70.2 da Lei 7/1985, de 2 de abril, de Bases do Réxime Local.

“ORDENANZA REGULADORA DO PRÉSTAMO DE BIOTRITURADORAS A PARTICULARES PARA A XESTIÓN DA BIOMASA DOMICILIARIA”

CAPÍTULO I. DISPOSICIÓN XERAIS

Artigo 1. Obxecto.

O presente regulamento ten por obxecto establecer as normas ás que deberá axustarse o préstamo de biotrituradoras propiedade da Mancomunidade de Concellos do Morrazo, determinando os dereitos, obrigas e réxime de infraccións e sancións.

A Mancomunidade de Concellos de Morrazo, vai poñer a disposición da veciñanza este servizo, fomentando unha correcta xestión dos residuos de orixe vexetal xerados no ámbito municipal, contribuindo así a:

- Evitar que estes residuos rematen no circuíto de recollida do lixo, co conseguinte custe asociado a danos materiais e de xestión.
- Obter un produto de valor engadido para o programa de compostaxe da Mancomunidade de Concellos de Morrazo, no que pode ser empregado como estruturante, ou incluso como material de acolchado para horta e xardín.
- Reducir o número de queimas, minimizando riscos de incendio e contaminación ambiental.



Martes, 23 de novembro de 2021

Núm. 226

Artigo 2. Ámbito do Servizo.

O ámbito do servizo queda circunscrito ó uso da maquinaria dentro dos límites da Mancomunidade de Concellos do Morrazo.

Artigo 3. Fundamento Legal.

A Mancomunidade de Concellos do Morrazo, para a xestión dos seus intereses, e no ámbito das súas competencias, pode promover toda clase de actividades e servizos públicos que contribúan a satisfacer as necesidades ambientais e a mellorar a calidade de vida.

A Mancomunidade na súa calidade de Administración pública de carácter territorial e dentro da esfera das súas competencias, exercita a potestade regulamentaria que lle atribúe o artigo 4.a) da Lei 7/1985, do 2 de abril, reguladora das Bases de Réxime Local, e de conformidade co artigo 2 dos estatutos da Mancomunidade de Concellos do Morrazo. En relación cos artigos 22.2.d) 25.2. b) da Lei 7/1985; do artigo 5.b) dos estatutos da Mancomunidade; e do artigo 33 do Decreto do 17 de xuño de 1955, polo que se aproba o Regulamento de Servizos das Corporacións Locais e o artigo 6 da Lei 5/1997 de 22 de xullo de administración local de Galiza.

Artigo 4. Potestades.

Nas materias obxecto deste Regulamento, esta Mancomunidade, ostenta cantas potestades lle confire o artigo 4 da Lei reguladora das Bases de Réxime Local e demais normativa aplicable, incluídas as potestades de inspección do servizo e sancionadora.

*CAPÍTULO II. ORGANIZACIÓN E FUNCIONAMENTO DO SERVIZO***Artigo 5. Características do Sistema de Préstamo de Biotrituradoras.**

O sistema está composto por biotrituradoras ubicadas nas dependencias dos tres Concellos que constitúen a Mancomunidade, onde serán recollidas polas persoas usuarias cos seus propios medios. Unha vez rematado o prazo de préstamo, as biotrituradoras serán devoltas ao mesmo lugar.

A persoa encargada de facer a entrega e estar presente na recollida das biotrituradoras, dentro das dependencias municipais, será a Mestra Composteira Municipal ou, en ausencia desta, a persoa designada por cada Concello. A Técnica municipal ou persoa designada levará a cabo a revisión técnica e despois de asegurarse de que a maquinaria se atopa en óptimo estado, procederá a gardar a trituradora no lugar indicado para o seu almacenamento. Así mesmo, cando a persoa usuaria detecte algún desperfecto ou algún fallo técnico na maquinaria deberá comunicarse telefonicamente co Concello.

A mestra composteira ou a persoa designada polo concello será a encargada de explicar o funcionamento aos usuarios no momento da entrega das biotrituradoras.



Martes, 23 de novembro de 2021

Núm. 226

Artigo 6. Persoas usuarias do servizo.

Poderán ser persoas usuarias do servizo mancomunado de préstamo de biotrituradoras, todas as persoas maiores de idade, con domicilio nos concellos da Mancomunidade e que se atopen ao corrente nas súas obrigas tributarias coa Mancomunidade, mediante a presentación no momento da solicitude dun xustificante de ter abonado o recibo da taxa da recollida do lixo da Mancomunidade.

As persoas solicitantes serán persoas físicas e o emprego das biotrituradoras será sempre no ámbito privado domiciliario, non podendo ser utilizado o material con ánimo de lucro.

Artigo 7. Presentación de solicitudes de particulares

Toda persoa que pretenda empregar o servizo mancomunado de trituración deberá presentar a solicitude mediante o impreso de solicitude por medios telemáticos, vía cuestionario online na páxina web de cada concello ou vía correo electrónico facilitado para tal uso, ou ben presentando o impreso de maneira presencial nas dependencias municipais. A persoa solicitante deberá entregar xunto coa solicitude un xustificante de ter abonado o recibo da taxa de lixo.

Os impresos de solicitude estarán dispoñibles para a súa descarga nas páxinas webs dos Concellos e da Mancomunidade ou de maneira presencial nas dependencias municipais.

Os concellos procederán á tramitación da solicitude e poranse en contacto coa persoa interesada.

A solicitude deberá ser presentada, polo menos, cunha semana de antelación ao día que pretende retirar a trituradora. Se existisen varias solicitudes ao mesmo tempo, atenderanse as peticións por orde de entrada.

Artigo 8. Funcionamento do Servizo Mancomunado de Préstamo de Biotrituradoras.

Para recoller a biotrituradora a persoa usuaria deberá poñerse en contacto alomenos cun día de antelación e comunicar o día e a hora na que se efectuará a retirada.

O horario do servizo será de luns a venres de 09:00 a 14:00 h.

Os Concellos resérvanse a posibilidade de modificar as datas acordadas de préstamo e/ou horarios en función da dispoñibilidade das biotrituradoras así como, a xestión dos impresos de solicitude e de entrega e a revisión da maquinaria unha vez entregada.

Para retirar a biotrituradora, deberá cubrirse un impreso onde se indicará o nome da persoa usuaria rexistrada, o día que se fai entrega da maquinaria e o día no que se traerá de volta ás dependencias municipais (o préstamo non poderá exceder os 5 días naturais). En caso de non presentarse na data e hora acordadas, a biotrituradora porase a disposición da seguinte solicitude. No momento de devolución da maquinaria entregarase un impreso onde se indicará a data de devolución, horas de uso durante o préstamo e incidencias se fose o caso.



O material a entregar coa máquina será:

- Cable extensor
- Guía rápida de utilización

Artigo 9. Condicións de Utilización.

- O emprego das trituradoras límtase a persoas físicas, para uso particular e privado, sempre dentro dos límites territoriais do concello, sendo a persoa usuaria a responsable a todos os efectos do seu manexo, transporte e as súas consecuencias.
- O emprego da maquinaria límtase a trituración de restos leñosos procedentes de podas domiciliarias: ramas de árbores froiteiras, viña, árbores ornamentais restos de xardinería, etc.
- A duración do préstamo límtase, como máximo, a 5 días incluíndo no cómputo, sábados, domingos e festivos. Cando o período de préstamo expire fora do horario de apertura do Concello, a maquinaria entregárase no horario de apertura máis próximo.
- Entre dous períodos de préstamo consecutivos, deberá pasar alomenos unha semana.
- Na devolución da maquinaria, a mestra composteiraou a persoa designada polo Concello fará unha breve revisión dos seus compoñentes, e verificarase o correcto funcionamento, sendo responsable do mesmo a persoa usuaria que está a utilizar a máquina, ata a aceptación da devolución pola administración.

CAPÍTULO III. DEREITOS E OBRIGAS DAS PERSOAS USUARIAS

Artigo 10. Dereitos.

- Toda a veciñanza ten dereito ao uso do servizo, cumprindo as condicións establecidas en artigos anteriores.
- Toda a veciñanza ten dereito ao emprego da maquinaria no ámbito privado, dentro dos límites dos Concellos da Mancomunidade.

Artigo 11. Obrigas.

- Toda persoa usuaria do servizo está obrigada a un correcto uso da maquinaria en préstamo.
- Toda persoa usuaria do servizo está obrigada ao cumprimento das normas establecidas na presente ordenanza.
- Toda persoa usuaria deberá respectar en todo momento estas normas, sen prexuízo do cumprimento doutros regulamentos, normas, e lexislación vixente que afecte ao emprego desta maquinaria ou ás consecuencias da súa utilización.



- Serán de obrigado cumprimento as indicacións ofrecidas pola mestra composteira ou persoal responsable do servizo do concello no tocante ao mantemento e correcto funcionamento da máquina.
- Calquera incidente ocorrido durante o emprego da maquinaria, deberá ser comunicado aos teléfonos facilitados pola Mancomunidade, na maior brevidade posible.
- A persoa usuaria responderá de calquera dano que se cause na maquinaria por un transporte ou uso incorrecto da mesma, eximindo á Mancomunidade de toda responsabilidade.
- A persoa usuaria será responsable do correcto uso da maquinaria e da adopción das medidas de seguridade que fosen precisas para evitar danos propios ou a terceiras persoas.
- A mancomunidade non será responsable de calquera dano que sufra a persoa usuaria ou unha terceira polo mal uso da maquinaria.

Artigo 12. Prohibicións.

- Prohíbese o emprego da maquinaria fora dos límites territoriais da Mancomunidade.
- Prohíbese á persoa usuaria o préstamo, aluguer, cesión ou calquera disposición da maquinaria ou accesorios a favor de terceiras persoas.
- Prohíbese o emprego da maquinaria en limpeza de restos de talas forestais.
- A introdución de restos vexetais que superen o grosor ou diámetro ou forma admitidos pola máquina.
- Prohíbese a introdución de elementos distintos aos indicados no artigo 9 “condicións de utilización” para o emprego da maquinaria. En concreto, prohíbese a introdución de restos verdes non leñosos, tales como herba, restos de flores, plantas arrincadas, etc e restos con terra.
- Prohíbese a desmontaxe ou manipulación da maquinaria, excepto aquelas accións indispensables, indicadas na guía rápida de utilización, destinadas ao correcto funcionamento da mesma, ou ao seu transporte.

Artigo 13. Obrigas en caso de furto ou roubo.

- Efectuar a correspondente denuncia na policía.
- Comunicar telefonicamente ao Concello depositario da biotrituradora e presentar copia da denuncia no Mancomunidade.
- No caso de non presentar denuncia, considerarase a inhabilitación definitiva no servizo, sen prexuízo de aplicarse o réxime sancionador correspondente.



*CAPÍTULO IV. RÉXIME SANCIONADOR***Artigo 14. Principios xerais**

Será infracción administrativa o incumprimento das obrigas, prohibicións e requisitos establecidos na presente Ordenanza. O réxime sancionador deste Regulamento exercerase de acordo co establecido na Lei 40/2015 e na Lei de Procedemento Administrativo Común das Administracións Públicas e, de conformidade co disposto no Título XI da Lei 7/1985, do 2 de abril, reguladora das Bases de Réxime Local.

Artigo 15. Clasificación das infraccións.

As infraccións clasificaranse como leves, graves ou moi graves, sen prexuízo de que todo incumprimento disposto nesta ordenanza, constitúe unha infracción da mesma, quedando a consideración do concello a súa clasificación como leve, grave ou moi grave, e a conveniencia ou non da súa sanción e os termos da mesma, no ámbito das súas competencias.

INFRACCIÓNS LEVES

Serán leves as seguintes infraccións:

- O retraso na devolución da maquinaria non debida a causas xustificadas.
- Non respectar as tarefas mínimas de limpeza, conservación e mantemento da máquina.

INFRACCIÓNS GRAVES

Serán graves as seguintes infraccións:

- O emprego da maquinaria fora dos ámbitos establecidos para o seu emprego (horta e xardinería).
- O préstamo ou cesión a terceiras persoas.
- O manexo por persoas distintas da persoa titular do préstamo.
- Producir danos na máquina por un uso incorrecto da mesma, sen prexuízo de ter que asumir os gastos debidos á súa reparación.
- Uso incorrecto da maquinaria que de lugar a risco en bens ou en persoas.
- Coidado non axeitado da maquinaria no seu uso, transporte ou devolución, que provocasen danos na mesma.
- A reiteración na comisión de dúas faltas leves.

INFRACCIÓNS MOI GRAVES

Serán infraccións moi graves:



Martes, 23 de novembro de 2021

Núm. 226

- O emprego da maquinaria con fins de lucro, estando expresamente prohibido o seu aluguer, venda ou emprego con fins comerciais, ou diferentes dos especificados para cada máquina.
- Non realizar denuncia no suposto de roubo.
- A reiteración na comisión de dúas faltas graves no período de doce meses.
- A perda da maquinaria ou non devolución da mesma.
- Non coidado axeitado da maquinaria no seu uso, transporte ou devolución, que provocasen danos graves na mesma.

Artigo 16. Sancións.

As infraccións ao presente regulamento darán lugar ás seguintes sancións:

- As faltas leves sancionaranse con penalizacións de suspensión temporal dun mes da persoa usuaria do servizo, e/ou multa de 60€.
- As faltas graves sancionaranse con multa de 61€ a 300€ e/ou suspensión temporal de un a seis meses da persoa usuaria no servizo.
- As faltas moi graves sancionaranse con multa dende os 301 € a 600€, e/ou a suspensión temporal da persoa usuaria do servizo de seis meses a baixa definitiva do servizo.

Artigo 17. Potestade sancionadora.

O exercicio da potestade sancionadora prevista nesta Ordenanza, corresponde, á Presidencia da Mancomunidade, con arranxo ao disposto nos artigos 21.1. n) da Lei 7/1985, do 2 de abril, reguladora das Bases de Réxime Local, sen prexuízo da posibilidade de delegar o exercicio da devandita atribución.

DISPOSICIÓN FINAL ÚNICA

Para todo o non regulado expresamente na presente ordenanza estarase ao disposto na normativa xeral aplicable a cada caso.

ENTRADA EN VIGOR

Esta Ordenanza entrará en vigor, unha vez aprobada definitivamente, e convenientemente publicada no Boletín Oficial da Provincia, unha vez transcorrido o prazo ao cal se refire o art.65.2 en relación con o 70.2 de a Lei 7/1985, Reguladora das Bases do Réxime Local.

Contra o presente Acordo, poderá interpoñerse recurso contencioso-administrativo, ante a Sala do Contencioso-Administrativo do Tribunal Superior de Xustiza de Galicia, no prazo de dous meses a contar desde o día seguinte á publicación do presente anuncio, de conformidade co artigo 46 da Lei 29/1998, de 13 de xullo, da Xurisdición Contencioso-Administrativa.

